

Mahasiswa perlu bijak berpolitik
Utusan Online
12 April, 2012

TEMERLOH 11 April - Mahasiswa Islam perlu proaktif dan bijak menggunakan kebebasan berpolitik seperti dicadangkan kerajaan menerusi pindaan Akta Universiti dan Kolej Universiti (AUKU).

Timbalan Menteri Pendidikan Tinggi, Datuk Saifuddin Abdullah berkata, golongan itu perlu proaktif dan bijak menggunakan kebebasan bagi mencorak persekitaran politik pelajar yang lebih segar dan menjadi pendorong utama ke arah transformasi negara.

Beliau berkata, mereka perlu menggunakan peluang tersebut bagi mengembalikan zaman kegemilangan Islam untuk membina pemikiran politik Islam yang demokratik, progresif dan matang.

"Sejarah gerakan mahasiswa Islam di negara ini bermula sejak 1930-an lagi menerusi tokoh-tokoh seperti Syeikh Tahir Jalaluddin dan Syed Sheikh al-Hadi.

"Kedua-dua tokoh tersebut memulakan gerakan pembangunan umat Islam ke arah pembangunan sosio ekonomi dan masyarakat manakala pada 1970-an pula muncul gerakan dakwah Islamiah oleh mahasiswa," katanya.

Beliau berkata demikian kepada pemberita selepas merasmikan pertandingan Tilawah al-Quran peringkat Daerah Temerloh di Masjid Abu Bakar di sini malam tadi.

Menurut beliau, suara gerakan mahasiswa mempengaruhi dasar-dasar baru kerajaan antaranya ialah cadangan penubuhan Universiti Islam dan Bank Islam.

Tambah Saifuddin, pindaan akta AUKU itu diharap dapat melahirkan lebih ramai mahasiswa Islam yang lebih bijak, positif dan proaktif bagi mengangkat martabat umat Islam.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0412&pub=Utusan_Malaysia&sec=Politik&pg=po_03.htm